

詞話叢編

恭綽



詞苑萃編卷之十五

南滙馮金伯治堂輯錄

句容裴 暢芝亭參訂

紀事六

海陵閱柳永望海潮詞有三秋桂子十里荷花句遂有立馬吳山之志淳熙中謝處厚詩云誰把杭州曲子謳荷花十里桂三秋那知卉木無情物牽動長江萬里愁余謂此不足以咎柳永也惟一時士大夫妝點湖山流連景物竟忘中

原爲可恨耳

鶴林玉露

海陵大舉南侵御前都統驃騎衛大將軍韓夷雅將射雕軍二萬三千圍子細軍一萬先下兩淮臨發賜所製喜遷鶯以爲寵曰旌麾初舉正駃騠力健嘶風江渚射虎將軍落鵬都尉繡帽錦袍翹楚怒礮戟髯爭奮捲地一聲鼙鼓笑談頃指長江齊楚六師飛渡此去無自隳金印如斗獨把功名取斷鎖機謀垂鞭

方略人事本無今古試展臥龍韜韞果見成功且莫問江左想雲霓望切元黃

迎路詞苑

金密國公壽字子瑜興陵諸孫也于書無所不讀而尤長于史學與元好問諸名士善明窗棊几展玩圖籍商略品第窮極高妙典衣置酒或終日不聽客去有承平王家故態金自明昌以還鎬厲二王得罪疎遠宗室壽亦棄而不用故放于詩文其樂府云夢到鳳凰臺上山圍故國周遭又云咫尺又還秋也不成長似雲間識者聞而悲之

金史論略

宋開禧中韓侂胄欲立蓋世功名以自固乃定議伐金金元帥紇石烈子仁頌兵駐濠梁時小劉之昂作樂章一闋大書於濠之倅廳壁間其詞曰蠆蜂搖螳螂振舊盟寒恃洞庭彭蠡狂瀾天兵小試百蹄一飲楚江乾捷書飛上九重天春滿長安舜山川周禮樂唐日月漢衣冠洗五州妖氣關山已平全蜀風行何用一泥丸有人傳喜日邊都護先還

古今詞話

金許道真性嗜酒每乘舟出村落間留飲或十數日不歸及溯流而上老稚奔走爭爲之挽舟數十里不絕嘗賦眼兒媚詞曰濁醪藟得玉爲漿風韻帶橙香持盃笑道鵝黃似酒酒似鵝黃世緣老矣不思量沈醉又何妨臨風對月山歌

野調儘我疎狂

詞苑

蔡正甫江城子云鵲聲迎客到庭除問誰歟故人車千里歸來塵色滿征裾珍重主人留客意奴白飯馬青芻東城入眼杏千株雪糝糊俯平湖與子花間隨分倒金壺歸報東垣詩社友曾念我醉狂無乃爲王季溫自北都歸過三河坐

中賦也

中州集

吳彥高在燕山赴張總持侍御家集張出侍兒佐酒中有一人意狀摧抑叩其故乃宣和殿小宮婢也因賦人月圓詞記之聞者揮淚其詞曰南朝千古傷心事猶唱後庭花舊時王謝堂前燕子飛向誰家恍然一夢仙肌勝雪雲鬢堆鴉江州司馬青衫淚濕同是天涯時宇文叔通亦賦念奴嬌先成而頗近俚鄙及

見彥高作茫然自失自後人有求作樂府者叔通即批云吳郎近以樂府高天

下可往求之

中州樂府

泰和己丑元好問裕之赴并州道逢捕鴈者捕得二鴈一死一脫網去其脫網者空中盤旋哀鳴良久亦投地死好問遂以金贖得二鴈瘞汾水傍壘石爲識號曰鴈邱因賦摸魚兒詞曰問世間情是何物直教生死相許天南地北雙飛客老翅幾回寒暑歡樂離別苦就中更有癡兒女君應有語渺萬里層雲千山暮雪隻影向誰去橫汾路寂寞當年簫鼓荒煙依舊平楚招魂楚些嗟何及山鬼暗啼風雨天也妒未信與鶯兒燕子俱黃土千秋萬古爲留待騷人狂歌痛飲來訪雁邱處欒城李治和云雙雙鴈正分汾水回頭生死殊路天長地久相思債何事眼前俱去摧勁羽偷萬一幽冥却有重逢處詩翁感遇把江北江南風嘹月唳并付一邱土仍爲汝小草幽蘭麗句聲聲字字酸楚拍江秋影今何在草長欲迷隄樹霜魂苦算猶勝玉嬙青塚眞孃墓憑誰說與對鳥道道空

龍艘古渡馬耳淚如雨

中州樂府

正大四年有狂僧李菩薩者就都人楊廣道家宿一日大寒楊與之酒李晨出舉酒盃聞其嘆酒聲入曰淨明亭前花開矣已而牡丹開兩花來觀者車馬闐咽酒尊爲之一空元遺山賦滿庭芳詞記之云天上殷韓解羈官府爛遊舞榭歌樓開花釀酒來著帝王州嘗見牡丹開後獨占斷穀雨風流僊家好霜天槁葉穠豔破春柔狂僧誰借手一盃喚起綠怨紅愁天香國豔梅菊背人羞盡揭

紗籠護日容光動玉學瓊舟都人士女年年十月常記遇仙樓

錦機集

王德新玉溪在嵩山之前費莊兩山之絕勝處也遺山作水調歌頭以紀之云空濛玉華曉瀟灑石淙秋嵩高大佳處元在玉溪頭翠壁丹崖千丈古木寒藤兩岸邨落帶林邱今日好風色可以放吾舟百年來算惟有此翁游山川邂逅佳客猿鳥亦相留父老雞豚鄉社兒女籃輿竹几來往亦風流萬事已華髮

吾道付滄洲

詞苑

蘇小媚錢唐名倡也其妹盼奴與太學生趙不敏狎不敏赴官三載後有祿俸
餘資囑其弟趙院判遺盼奴且言盼奴妹小媚俊雅可謀致之佳耦也院判如
言至錢唐則盼奴一月前死矣小媚亦爲盼奴所歡以於潛官絹誣扳繫獄院
判言於府倅倅召出之付以所遺物小媚自謂不識院判何人及折書惟一詩
倅索和之援筆書云君住襄江妾住吳無情人寄有情書當年若也來相訪還
有於潛絹也無倅喜免其償絹脫籍歸院判焉元遺山題小媚圖詞云綠陰庭
院宜清晝簾捲香風逗美人圖子阿誰留都是宣和名筆內家收鶯鶯燕燕分
飛後粉淡梨花瘦只除蘇小不風流斜插一枝萱草鳳釵頭遺山樂府
都城外有萬柳堂廉野雲置酒招盧疎齋趙松雲同飲時歌妓解語花者左手
折荷花右手執盃行酒歌小聖樂詞云綠葉陰濃徧池亭水閣徧趁涼多海榴
初綻朶朶蹙紅羅乳燕雛鶯弄語對高柳鳴蟬相和驟雨過似瓊珠亂撒打徧
新荷人世百年有幾念良辰美景休放虛過富貴前定何用苦張羅命友邀賓

燕賞飲芳醕淺斟低歌且酩酊從教二輪來往如梭此詞載錦機集蓋元遺山

預爲製曲以教歌者也

古今詞話

壬辰北渡順天毛楊二生祈仙蘇晉降乩有百僞無一真中有羲皇醇二句以語元遺山遺山云此予少時所作晉豈予前身耶二生更述其酒裏神仙我之句公因作詞云繡佛長齋半生枉伴蒲團過酒壚橫臥一蹴虛空破頗笑張顛自謂無人和還知麼醉鄉天大少箇神仙我同上

元光初李欽叔與元裕之在孟津辛敬之愿白女儿來爲留數日其行也欽叔爲設饌備極豐腆敬之放筋嘆曰平生飽食有數每見吾二弟必得美食明日道路中又當與老飢相抗去矣會有一日辛老子僵臥柳泉韓城之間以天地爲棺椁日月爲含襪狐狸亦可螻蟻亦可二人爲之惻然嘗共游河山亭敬之賦臨江仙留別二人云誰識虎頭峯下客少年有意功名清朝無路到公卿蕭蕭華屋白髮老諸生邂逅對床逢二妙揮毫落紙堪驚他年聯袂上蓬瀛春風

蓮燭莫忘此時情

詞苑
叢譚

大名民家有男女以私情不遂赴水死後三日二尸相携而出于水濱是歲此
陂荷花無不並蒂者李仁卿賦摸魚兒以記其事云爲多情和天也老不應情
遽如許請君試聽雙蕖怨方見此情真處誰點注香湫豔銀塘對抹燕脂露藕
絲幾縷絆玉骨春心金沙曉淚漠漠瑞紅吐連理樹一樣驪山懷古古今朝暮
雲雨六郎夫婦三生夢幽恨從來難阻須念取鴛鴦翡翠照影長相聚秋風不
住悵寂寞芳魂輕菸北渚涼月又南浦

同上

延祐初永嘉滕穆寓臨安聚景園月夜遇一麗人自言故宋理宗宮人衛芳華
也命女侍名翹翹者設茵席陳酒果邀滕共飲白歌木蘭花慢詞以侑觴云記
前朝舊事曾此地會神仙向月地雲階重携翠袖來拾花鈿繁華總隨流水歎
一場春夢杳難圓廢港芙蓉滴露斷堤楊柳搖煙兩峯南北只依然輦路草芊
芊恨別館離宮煙消鳳蓋波沒龍船平生玉屏金屋對漆鐙無燄夜如年落日

牛羊塚上西風燕雀林邊遂留翹翹守宅而隨生焉經三年忽云冥緣已盡遂

別樂府
紀聞

張怡雲大都名伎也姚牧庵閣靜軒每于其家小飲賞佐貴人行酒姚偶言暮
秋時三字閣命怡雲續而歌之張應聲作小婦孩兒且歌且笑暮秋時菊殘猶
有傲霜枝西風了却黃花事貴人曰且止遂不成章姚又有寄征衣詞云欲寄
君衣君不還不寄君衣君又寒寄與不寄間妾身千萬難人多傳之同上

元宣徽院使孛羅有杏園每年春諸女設鞦韆于園中適樞密同簽帖木耳不
花子拜住過園外窺一女絕色歸白之父遣媒求婚孛羅邀令賦鞦韆拜住以
國字寫菩薩蠻詞云紅繩畫板柔荑指東風燕子雙雙起誇俊與爭高更將裙
繫牢牙牀和困睡一任金釵墜推枕起來遲紗窗月上時孛羅遂以前女許爲

婦同上

歌兒珠簾秀朱氏姿容殊麗雜劇當時獨步胡紫山宣慰極鍾愛之嘗擬沉醉

東風小曲以贈云錦織江邊翠竹絨穿海上明珠月淡時風清處都隔斷落紅
塵土一片閒情任卷舒挂盡朝雲暮雨馮海粟亦有鷓鴣天云十二闌干映遠
眸醉香空斷楚天秋蝦鬚影薄微微見龜背紋輕細細浮香霧斂翠雲收海霞
爲帶月爲鈎夜來捲盡西山雨不著人間半點愁皆咏珠簾以寓意也由是聲

價益騰

堯山堂
外紀

趙孟頫子昂宋太祖子秦王德芳之後也四世祖伯圭賜第湖州遂爲湖州人
宋末爲眞州司戶參軍至元中以程鉅夫荐授兵部郎中累官翰林學士承旨
在李叔固丞相席間贈歌者貴貴浣溪紗詞云滿捧金卮低唱詞樽前再拜索
新詩老夫慚愧鬢成絲羅袖染將修竹翠粉香須上小梅枝相逢不是少年時

同上

元盛時揚州有趙氏者富而好客其家有明月樓人作春題多未當其意一日
趙子昂過揚主人知之迎至樓上盛筵相款酒半出紙筆求作春題子昂援筆

書云春風闋苑三千客明月揚州第一樓主人得之甚喜盡徹席間銀器以贈
貫雲石亦有詞咏樓調寄水龍吟云晚來北海風沈滿樓明月留人住橘花香
外玉笙初響修眉如妬十二闌干等閒隔斷人間風雨望畫橋檐影紫芝塵暖
時喚起登臨趣回首西山南浦問雲物爲誰掀舞關河如此不堪騎鶴儘堪來
去月落潮平小衾夢轉已非吾土且從容對酒龍香澆繭寫平山賦

南濠詩話

李仲仁漫翁湖中製畫舫始用布帆張伯雨爲名曰浮家泛宅并題太常引云
莫將西子比西湖千古一陶朱生怕在樓居也用著風帆短蒲銀餅索酒并刀

斫鱸船背錦糲糊堤上早傳呼那箇是煙波釣徒

湖船錄

黃季景湖亭蓮花中有雙頭一枝方邀客同賞而爲人折去季景惘然張仲舉
爲作摸魚兒詞云問西湖舊家兒女香魂還又連理多情欲賦雙蕖怨閒却滿
匳秋意嬌旖旎愛照影紅妝一樣新梳洗王孫正擬喚翠袖輕歌玉笙低按涼
夜爲花醉鴛鴦浦淒淒凌波夢裏空憐心苦絲脆吳娃小艇應偷採一道綠萍

猶碎君試記還怕是西風吹作行雲起闌干漫倚待載酒重來尋芳已晚餘恨

渺煙水

詞苑叢談

廣陵冬夜與松雲子論五音二變十二調且品簫以定之清濁高下旋相爲宮
犁然律呂之均雅俗之應也不覺漏下月滿霜空神情爽發松雲子吹春從天
上來曲音韻淒遠予亦飄然作霞外飛仙想因倚聲和之用紀客次勝趣是丙
子孟冬十又三夕也詞云嫋嫋秋風聽響徹雲間彩鳳啼雄羸女飛下玉珮玲
瓏腸斷十二臺空渺霜天如海寫不盡楚客情濃燭銷紅鱗金振羽變徵移宮
揚州舊時月色歎水調如今離唱誰工露葉殘蛾蟾花遺粉寂寞瑤樹香中間
坡仙何處滄江上鶴夢無蹤思難窮一襟幽怨吹與魚龍蛻巖詞
摸魚兒元夕吳門姚子章席上同柯敬仲賦敬仲以虞學士書風入松于羅帕
作軸故末語及之楚芳吳蘭二伎名詞云記蘇臺舊時風景西樓鐙火如畫東
城月色依然好無復綺羅游冶歡意謝向客裏相逢還有思陶寫金尊翠舉把

錦字新聲紅牙小拍分付倦司馬繁華夢喚起燕嬌鶯媚官教孤負元夜楚芳
玉潤吳蘭媚一曲夕陽西下沈醉罷試問人生誰是無情者先生歸也但留意

江南杏花春雨和淚在羅帕

同上

吳興卞君應午能詩詞美丰度與弟應奎友愛甚至老猶共寢席至元中膺茂
異薦授郡州判官少游於杭偕故宋遺老倡和有湖隄柳枝詞云搓黃撚綠啐
西風學小蠻腰態偷工解道斷腸難著句只堪水調唱玲瓏韻致不減唐人晚
寓溧陽時仇山邨先生教授邑中詩筒還往晨夕無閒嘗以谿居江行二集寄

余皆少作也惜未見其近年老筆

曾遇學古齋臆記

世俗以二月十五爲花朝節杭城園丁競以花名荷擔叫鬻音中律呂喬夢符
有賣花聲詞云侵曉園丁叫道嫩紅嬌紫巧工夫攢枝餽蘂行歌佇立灑洗妝
新水捲香風看街簾起深深巷陌有箇重門開未忽驚他尋春夢美穿窗透閣
便憑伊喚取惜花人在誰根底按夢符又有天淨沙詞云鶯鶯燕燕春春花

柳柳眞眞事事風風韻韻嬌嬌嫩嫩停停當當人人此等句亦從李易安尋

覓覓得來

詞苑叢談

予與萬喜愚公別十餘年至元庚寅秋日忽相遇於西湖儻舍一餉即別去賦柳枝詞贈予云折贈征人事等閒不須辛苦慘離顏何如剗盡前朝樹莫送金輿去不還予答之云禁柳蕭蕭故國秋行人端不繫離愁勸君莫折煙條盡留

待迎蠻拂采輶

王執禮行寮瑱筆

會波邨在松江城北三十里其西九山離立若幽人冠帶拱揖狀一水並九山南過邨外以入於海溝塍吠澮隱翳竹樹間春時桃花盛開雞犬之聲相聞有武陵風概隱者停雲子居焉一舟時放中流或投竿或彈琴或呼酒獨酌或哦詠陶謝韋柳詩殆將與功名相忘嘗坐余舟中作茗供襟抱清曠不覺度成溪山好一曲主人即補入中呂調命洞簫吹之與童子權歌相答極鷗波縹緲之

思

陶宗儀

崑山顧阿瑛好遊每出必以筆墨自隨往來九峯遯浦間自種金粟後身一日
同陳浩然游支硎山飲於張氏樓徐姬楚蘭佐酒以琵琶度曲座客剡雲臺爲
之心醉阿瑛口占蝶戀花詞戲之有云玉手佳人笑把琵琶理狂殺雲臺標外

史斷腸只合江州死一時爭傳唱之

古今詞話

博陵縣有郝仙女廟仙女魏青龍中人年及笄姿色姝麗採蘋水中蒼烟白霧
俄失所在其母哀泣水濱願言一見良久異香襲人隱約於波渚間曰兒以靈
契託蹟綃宮陰主是水府世緣已斷無用悲悒而今而後使鄉社田蠶歲宜有
感而通乃爲吾驗後人立廟祀之王正之題喜遷鶯詞云汀洲蘋滿記翠籠采
采相將鄰媛蒼渚煙生金支光爛人在霧綃鮫館小鬟頓成雲散羅襪凌波不
見翠鸞遠但清溪如鏡野花留鈿情嗒驚變現身後神功緣就吳蠶繭漢女菱
歌湘妃瑤瑟春動倚雲層殿彤車載花一色醉盡碧桃清宴故山晚歎流年一

笑人間飛電

詞品

楊鐵崖年未七十休官駕一舟名春水宅往來九峯三泖間東南才俊之士造門納屨無虛日酒酣以往筆墨橫飛鉛粉狼籍或載華陽巾披鶴氅坐船屋上吹鐵笛作梅花弄或呼侍兒歌白雪之詞自倚鳳琶和之賓客皆踟躕起舞以爲神仙中人竹枝盛於元季鐵崖集之自製亦至五十餘首

古今詞話

楊鐵崖云往年與大癡道人扁舟東西泖間或乘輿涉海抵小金山道人出所製小鐵笛令余吹洞庭曲道人自歌小海和之不知風作水橫舟楫揮舞魚龍

悲嘯也

太平清話

滕玉霄有贈宋六嫂百字令云柳顰花困把人間恩愛尊前傾盡何處飛來雙比翼直是同聲相應寒玉嘶風香雲捲雪一串駙珠引元郎去後有誰著意題品誰料濁羽清商繁絃急管猶自餘風韻莫是紫鸞天上曲兩兩玉童肩並白髮梨園青衫老傅試與流連聽可人何處滿庭霜月清冷六嫂小字同壽元遺山有贈鶯篋工張翥兒詞即其父也嫁於宋每與其夫合樂妙入神品蓋六嫂